



Iohannes Eckius natus est 13 Nouemb. anno 1486 in Sueuia sub ditione episcopi Augustani. Octo annorum puer Rotenburgi potissimum literis imbui cœpit, apud patrum suum sacerdotem non indoctum. Cum uerò à patruo domi, & à magistro in schola diligenter erudiretur, eò intra triennij spaciũ peruenit, ut Dialecticã aliqua ex parte degustaret, & priuata lectione pulcherrimarum rerum cognitioni inhiaret. iam enim suo patruo sub tempus prædij & cœnæ biblicas historias, & quædam in Augustino, demũ & in decretalibus, & in alijs nouis scriptis, selectioribus tamen (quantum eius seculi salebras subterfugere licebat) articulatè legere cogebatur. Vnde quidem consumpto prius in academia Haidelbergensi unico solum anno, & Tubingæ mensibus quinque, artium baccalaureus dignè creatur, quod accidit anno 1499, prima die Octobris. Mox adiunctis necessarijs studijs, præterlapso alio adhuc anno & trimestri tempore, etsi ætate minor esset permittu tamen professorum, liberalium artium magister creatur, anno ætatis 15. Quo gradu suscepto statim Theologiam discere cœpit: hoc quidem tempore, etsi natura quodammodo abstemius esset, cœpit bibere uinũ: sed Tubingæ grassante iã peste, extorsa prius à patre & patruo pecunia, anno 1501 mense Octob. Coloniam concessit, quod is locus Theologiæ studio celebraretur: ibi auditis utilissimis quibusdã lectionibus, anno sequenti, spectatis prius Aquisgranensibus reliquijs, in patriam & Rotenburgum est reuersus. Delectoq; mox sibi firmiore loco, Friburgi Theologiæ amplius operam dare, & docendo in philosophia sese sustentare animo constitutum habet. quæ res iam quidem bene cœpta erat, cum ecce ibi quoq; ingruente peste, quiete ei frui non licet, sed ut alij fecerant magistri, Kitzingam suas transfert Musas: non abstinens interim ab iniurijs parentibus, quod in uita sæpissime fecit, præter alias frequentissimas peregrinationes, quæ nullo modo omnes annotari potuerunt.